

Incumbensa Hofmann concernent la trasparenza dals salaris en l'administraziun chantunala

Discurren davart il salari è in tabu en Svizra, trasparenza dals salaris è in pled ester. Quai impedescha tranter auter mintga progress en chaussas egualitad dals salaris tranter dunna ed um. I dat nundumbraivlas descripziuns da dunnas, cunzunt da dunnas en ils caders, che vegnan a savair per spira casualitad che lur collegas – che han en il meglier cas ina scolaziun cumparegliabla e che lavuran pli u main tuttina ditg per il manaschi – survegnan in salari pli aut ch'ellas. Da proceder cunter quai è tut auter che simpel, perquai che la dunna, e betg forsà la patrùna, ha la chargia da cumprova tenor la Lescha d'egualitad.

In dals meds cunter talas situaziuns è quel da stgaffir trasparenza. Las sutsegnadras ed ils sutsegnaders incumbenseschan la Regenza d'introducìr la trasparenza dals salaris en l'administraziun chantunala. L'administraziun chantunala vegn alimentada tras daners da taglia e perquai han la publicitad e las persunas cun dretg da votar in interess pli grond da vegnir a savair, co che quests daners da taglia vegnan impundids. Il chantun Grischun è in da dus (!) chantuns en Svizra che na communitgeschan bunamain naginas infurmaziuns davart ils salaris pajads en l'administraziun. En ils ulteriurs chantuns pon las tabellas dals salaris cun las classes da salari e cun las scalas dals salaris vegnir consultadas sin las paginas d'internet correspondentas. Unicamain en l'artitgel 18 da nossa Ordinaziun dal persunal vegnan descrits ils principis da la tabella dals salaris, uschia ch'ina collavuratura bain infurmada po circa calcular il salari pajà. I n'è anc betg uschè daditg che las collavuraturas ed ils collavuraders chantunals na chattavan naginas indicaziuns davart lur classa da salari sin il rendaint dal salari. Plinavant n'èsi betg transparent, tge criteris da l'analisi da la funcziun che mainan a tge classificaziuns concernent il salari e pertge ch'i dat in svilup dals salaris retardà en cas da novs engaschaments.

La presidenta da la Cumissiun europeica Ursula von der Leyen ha avert ils 8 da mars 2021 la consultaziun tar ina nova directiva davart la trasparenza dals salaris. En quella vegnan tranter auter las interpresas obligadas da communitgar il salari inicial en la publicaziun da la piazza. En l'Austria èsi dapi 10 onns obligatoric d'inditgar il salari inicial en inserats da plazzas. Argumentà vegn quai er expressivamain cun l'egualitad dals salaris tranter dunna ed um.

Schizunt en Svizra datti interpresas ch'enconuschan la trasparenza dals salaris. En emprima lingia ils Verkehrsbetriebe Zürich (VBZ) u l'organisaziun «Médecins Sans Frontières». Er la cussegliaziun interchantunala da persunal «careerplus» fa quai sin ses portal da plazzas.

Per stgaffir trasparenza dals salaris en l'administraziun chantunala incumbenseschan las sutsegnadras ed ils sutsegnaders la Regenza:

1. da render accessibel a tuts la tabella dals salaris cun las classes da salari e cun las scalas dals salaris e da publitgar quai en l'internet per mauns da la publicitad interessada.
2. d'inditgar en ils inserats da plazzas da l'administraziun chantunala il salari inicial per la classa da salari respectiva.
3. d'infurmar las collavuraturas ed ils collavuraders da l'administraziun chantunala en moda transparenta e chapibla davart la classificaziun e davart il svilup da lur salari.

Tavau, ils 16 da zercladur 2021

Hofmann, Müller (Favugn), Noi-Togni, Atanes, Baselgia-Brunner, Cantieni, Caviezel (Cuir), Degiacomi, Gartmann-Albin, Horrer, Perl, Preisig, Rettich, Rutishauser, Schwärzel, von Ballmoos, Wilhelm, Spadarotto, Stieger, Tomaschett (Cuir)